

# GALATIYA

## Warage o Ayeedek Pól Ol o Joowo Abaak Galatiya

**1** <sup>1</sup> Aneeta Pól o kaŋeryai kizi toonnyai. Alaŋ zin aŋeranan eeti ci deer, bar aŋeranan Yesu Kiristo kibeem Jook ween baatinai baal ijaani nɔɔɔ daayiza e. <sup>2</sup> Naana kibeem ol o karomena ŋaato dook kazaayuy igeet bor o Joowo abaaku Galatiya ŋinaante. <sup>3</sup> Abon bai Jooi ween baatinai ki Manyi ona Yesu Kiristo anyuy igeet deŋen been ganɔn. <sup>4</sup> Ma giye o ka korogti naaga kaale ci loocu ger noko, agama Kiristo daayiz ci adaakni niini baciinowe ogaac eo arɔɔŋi Jooi ween baatinai. <sup>5</sup> Abon zin abilna diŋdiŋoni Joowa nɔkɔ kodot. Nɔɔɔ neen.

### Kaviyak o Joowo doon, akɔm bodo oogi

<sup>6</sup> Inoko abiirnan aneet ɔɔ ŋaatunooŋ ɔɔɔt eŋe giye ci utuŋtu taman nɔkɔ Jook baal laadun otowawuy igeet bonate o Kiristo e. Ma bar ootu bodo kaviyawe ogen o. <sup>7</sup> Akɔm zin bar buk kaviyak oogi ceen didi, bar olla anyak ol oogi ci uulaluŋ igeet, ma arɔɔŋ kotoweece niigi kaviyak o Kiristo. <sup>8</sup> Mayo nuun da kuuwaweyuy naaga karabɔŋ een toonnyaiti ci Joowo, zɔɔz ci aŋɔɔwɔ kibeem kaviyak o Joowo baal kuuwaweyuy naaga e, abon koca apayek Jooi nɔɔɔ goo o abil been neen. <sup>9</sup> Inoko bodo kabedeke zɔɔz nico. Kane mā anyak eet ci uuwaweyuy igeet zɔɔz ci aŋɔɔwɔ kibeem baal kuuwawekuy naaga e, abon apayek Jooi nɔɔɔ goo o abil been neen. <sup>10</sup> Alaŋ kaduwa zɔɔz nico o, ka kataltan ol ci deer, karabɔŋ ka kagawe ɔla. Akɔm! Bar kaduwa o ka katalɔ Jooi. Mā karooŋ ol kataltan aneet, alaŋ koca naana keen didi gabaren ci Kiristo.

### Gól o eene Pól toonnyai

<sup>11</sup> Dól o yaai tuwento, karooŋnyuy igeet agaac kaviyawa ci kuuwai naana o alaŋ een zozok ci avu eete ci deer. <sup>12</sup> Eeci alaŋ kajawa eete ci deer zozok ci eel nɔkɔ. Ma buk akɔm eet ci ademzekan aneet zozok nicoko. Bar Yesu neen o ayelekan aneet kaviyak nicoko niini alye onin eŋe.

<sup>13-14</sup> Iziiƙtu ri niiga baayiz onan baal kabaaye waan baal ŋaan karicane lotinok o ol ogan Juz e. Karican waanice naana lotinok niceke kibeem keeranɛ o jijitigan ɔɔɔt eŋe kujuk bul onan katobona dook. Gi baal zin kagide ol o tuwento ɔɔɔt kɔkɔmawan caki, ma karooŋ kuulali nɔɔɔ lai e neen.

<sup>15</sup> Ma kagoon kaal niceke neke, maje da bar Jooi eŋerawan aneet bonate onin laadun ijaan kitiryai e, ka kiliiŋiŋozek nɔɔɔ. <sup>16</sup> Iiya ni niini eyelizayan aneet ŋeerin, ka kuuwayek naana moden kaviyak ogin abon. <sup>17</sup> Ma ŋaan buk naana waanice kook Jerusalema ka kook kijin demziinok ole baal een toonnyak o Yesu laadun ɔɔwa ŋaatan e, bar waanice kako looce o kazi Arabiya, ma bodo kabadai Damacik. <sup>18</sup> Mazi kako kadica irkitok iiyu, kiiya ni koowa Jerusalema ka kook kagayowa ki Pitɔr, ma kako kamon ŋaatin ŋinaante iinya amonki tur. <sup>19</sup> Ma iinyaye ci baal kamone ŋaati Pitɔr neke, ŋaan kicin nuyak dook zee ma kacin Jemis ween gɔtoni Manyi Yesu doon.

<sup>20</sup> Kaduwakuy didi tammalya. Ma kaal ci kayeedekuy naana igeet noko dook kaal ceen didi, alaŋ kavɔlɔŋa.

<sup>21</sup> Ma vurtu kitiŋa koowa vitenane ogen looce o kazi Siriya been Silisiya. <sup>22</sup> Maje iinyaye niceke ol o tuwento abaak looce o kazi Judiya ŋaan kagayan niigi aneeta. <sup>23</sup> Bar olla da aziŋnan niigi ɔla azi ol ne, “Eeti baal gɔɔn agidet e, inoko niinilya buk uuwak kaviyak o Yesu baal gɔɔn arɔɔŋ kuturturen lai e.” <sup>24</sup> Ma waanice anaat niigi Jook ŋaatan giye ci kutuwɔye o.

**2** <sup>1</sup> Mazi kako kadica irkitok amɔtɔ wec, kimiirozeya bodo Jerusalem, korkorya kibeem Barnabas, ma kakoye buk Titos. <sup>2</sup> Akɔm eet ci awuyan aneet, bar kako gole ci ayelezakan Jooi aneet kooyi. Ma kako karumona kibeem alaŋ o ol o tuwento ŋaatinaaŋ doon, ma koobei nɔɔɔ kaviyak o Joowo baal kuuwaye ol o alaŋ een Juz e. Kagoon gi nico o, eeci alaŋ karooŋ olla kadaktan zɔɔ tuu liŋliŋonte onan baal kagoon baale e zee been inoko o. <sup>3-5</sup> Maje bar ŋinaante anyak ol oogi ci alutene eleeti kiziti ol ci atuwe. Ol nicigi ɔrkɔr gɔɔn tup nɔkɔ kibeem ol o atuwe kizi bar roote ka kicinit niigi gól o kabaai naaga ŋaaten Yesu. Ma arɔɔŋ niigi kadaŋteyet ageet lotinok ugeec. Arɔɔŋ niigi kadaŋtek Titos o korkorya been aneet teedinet, yo nuun een niini eet ci ol o kazi Garik o. Bar zin kotobora waanice naana zɔɔz nico ɔɔɔt eŋe, ma buk anuyan toonnyawa aneet zooze nico, eeci alaŋ karooŋnyuy naana igeet iziti bakbaye. Ma rogzen alaŋ aku teedinta karabɔŋ een lotinowe o Juz, bar aku ŋaati katuwi Yesu doon.

<sup>6</sup> Ma alaata o kavu karumona ki nɔɔɔ Jerusalema, akɔm gi ci kaŋorowona naana kibeem nɔɔɔ, ma akɔm buk niigi gi ci colai aduwakan aneet liŋliŋonta kina, eeci atubuzet Jooi ageeta dook. Mayo nuun een niigi alaŋ ci adikir o aga buk niigi eŋerawan Jooi aneet. <sup>7</sup> Ma bar buk icinit niigi liŋliŋon o anyan Jooi aneet ka kuuwayeke ol o alaŋ eegin Juz kaviyak ogin abon, kiyo buk anyek niini Pitɔr kuuwayek kaviyak ogin ol o Juz o. <sup>8</sup> Zin kiyo anyek Jooi Pitɔr dɔyize onin kizi toonnyai cin ole o Juz o, anyan buk niini aneet dɔyize onin kizi toonnyai cin ole o alaŋ eegin Juz. <sup>9</sup> Ma Pitɔr ki Jemis been Jɔn o eegin alaŋ o adikir agaac didi niigi anyan Jooi aneet liŋliŋon nico niini alya. Ma adizkeket niigi aneeta been Barnabas ka kemedawa naaga kuuwakteya ol o alaŋ eegin Juz zɔɔz o Joowo nɔkɔ. Maje niigi uwayek ol o Juz. <sup>10</sup> Ajinet zin waanice niigi olla gi codoi ci ka kitirita ol o amaŋ ŋaatineeŋ. Gi zin baal karooŋ buk laadun naana ɔɔɔt e neen.

### Agernyek Pól Pitɔr

<sup>11</sup> Mazi ako akunak Pitɔr kutur o kazi Antiyok, kegerenyeya naana nɔɔɔ ol kebereca, eeci anyak niini gi ci abac ŋinaante. <sup>12</sup> Rak ɔɔwa azɔlɔ niini kibeem bor o tuwento alaŋ eegin Juz labak. Bar mazi avɔ avu ol ci atuwe een Juz atoona Jemis Jerusalema, aara niini eŋe bitaala ole ona azɔlɔ e. Agɔɔn niini nɔkɔ o, eeci aŋole ol ci tuwento een Juz o, eeci gɔɔn arican niigi teedinet ci ol ceen moden o. <sup>13</sup> Buk ol ceen Juz atuwe abaak Antiyokti ɔtɔŋɔlte buk niigi ol ci avu Jerusalema o kiyo Pitɔr o. Ako zee meen nuun Barnabas eŋe ɔtɔŋɔle buk niini nɔɔɔ, makacin unuwun nɔɔɔ. <sup>14</sup> Mazi kako kaŋaamnei naana nɔɔɔ, kacin abacit niigi demziinok o Joowo. Kegerenyeya ni Pitɔr kɔle kɔrgena, kaneŋ ne, “Ŋedet niina een eet ci Juz. Bar zin iiten baale rak abaawu baayiz o ol o olla atuwe o alaŋ eegin Juz. Arooŋ zin bodo taman gól ci ka anyeke ol o alaŋ eegin Juz kabaakti baayiz ci ol o Juz o naa?”

<sup>15</sup> Ŋedet naaga karitai kiziti Juz, ma alaŋ katobɔ ki moden o oŋenu. <sup>16</sup> Kaga zin naaga eeti ci deer alaŋ abona ŋume o Joowo giye ci agami niini lotinok ci ol o Juz, bar kaga abona eeti ŋume o Joowo ŋaati atuwi Yesu Kiristo. Ma buk naana ki ineet katu Yesu Kiristo ka kanyet niini ageet kobonta Joowa ŋaaten tuwen, alaŋ een giye ci kazooni naaga lotinok o ol o Juz. <sup>17</sup> Mazi abaabanu

niiga gól ci karomoneke naaga Yesu ka kobontai ñume o Joowo o, bar kizik anyet ageet kutuguz oñe kiyo modena o, anyceyu zin koca niiga Yesu kizi eet ci aliñliñ gól ci oñecu. Alañ zin abil nòko. <sup>18</sup> Inoko bodo mā kamiire naana, ma kaka kagam lotinok o ol o Juz baal kotoña e, kabaca zin ri koca naana gól loror. <sup>19</sup> Inoko zin kotoña naana lotinok o Juz baal een daayiz e, ma kibila naana ñaatineñ kiyo kadaawa o, ka karogek Jook doon. <sup>20</sup> Kotodoyewa naana ki Kiristo keete ween talakec, ma rogeti ci karogne noko, alañ karugi naana doon, bar karogne Yesu o aavi ñaatan. Ma rogeti ci karogne naana loota ñina noko, karugi ñaaten tuwen o katuwe naana Yesu Kiristo ween Ñeerti Joowo o areezan aneet, ma adaai ñaatan. <sup>21</sup> Alañ naana karoñ kepez deten o Joowo kizi gi ci labak. Mā da kanyek Jooi eet ci deer kobona ñume onin lotinowe o Juz, adaawun zin da koca Kiristo gaga.

#### Lotinok been tuwen

**3** <sup>1</sup> Igeet aliyak ci Galatiya koko, ñeneen ci iya agaranyanuj tamarzeta o? Ma baale kizik koobteyuj igeet zoook o roget o abil been ñeen ñaaten daayiz o Yesu Kiristo keete ween talakec. <sup>2</sup> Bodo karoñ di kijinuj gi ce. Iiten baale akunakuj Vñjizi o Joowo e, eeci azoonu lotinok o Juz, yo da akunakuj giye baal iziiktu niiga kaviyak o Kiristo, ma utuyu? <sup>3</sup> Eeginu zin tarbale noko naa? Iiten baale rak akatawu niiga baayiz o colai ðoyize o Vñjiz o Joowo. Mayo inoko bodo orooñtu abaayit ðoyize ci eleeti ugooc doon? <sup>4</sup> Ma kaala ci meel baal agoononekuj igeet noko dook ñaatonooñ kaal ci labak? <sup>5</sup> Inoko anyuj Jooi igeet Vñjiz onin, ma agoon kaal ci ateeduj biye ñaatonooñ o, eeci azuunu lotinok o Juz? Akom kina! Agoon niini kaal nicoko o, eeci iziiktu kaviyak ogin, ma utuyu niiga nòon.

<sup>6</sup> Abaanit di zóoz o akati Ibrayim. Azi waragewi o Joowo ne, “Baale anyek Jooi Ibrayim kizi eet ci abon ñume onin e, eeci atuwe niini.” <sup>7</sup> Abon zin agayu niiga dól ci dól ci Ibrayim een didi ñeen ol o anyak tuwen. <sup>8</sup> Ayeedi waragewe o Joowo zóoz ci aduyai baale ci ka kanyeke niini moden dook kobonta ñume onin tuwenta. Ma buk aduwak Jooi Ibrayim kaviyak ci abon anek ne, “Amayuwi katin modena dook pada ñaaten ineet.” <sup>9</sup> Amayuk zin buk Jooi ol o atuwe inoko dook, kiyo baale amayuk niini Ibrayim tuwente onin e.

<sup>10</sup> Ma ol o abaan kizik bar ajowa niigi bonat ñume o Joowo gole ci azooni lotinok, aavi toriin ñaatineñ, eeci azi warage o Joowo ne, “Mā eeti calañ azooni kaal o aduwa lotinowa dook, aavi toriin o Joowo ñaatin.” <sup>11</sup> Inoko zin kagaac naaga akom bodo eet ci abona ñume o Joowo gole ci azooni lotinok o Juz, eeci azi warage o Joowo ne, “Eet ci arogi dook ñeen eeti ci abona ñume o Joowo tuwenta.” <sup>12</sup> Mazin lotinowa alañ een tuwen ñeen. Azi waragewi o Joowo ne, “Mā azooni eeti kaal o aduyai lotinowe dook kókom ci areyek nòon, arogi koca niini labak.” Bar zin akom eet ci anim kozooti lotinok dook, makacin alañaan lotinowa nici eela nòon.

<sup>13</sup> Mazin giye o anyaalet lotinowa ageet toriin, iya Kiristo orogozet ageet toriinte nico. Ooyi toriin onai niini, eeci azi waragewi o Joowo ne, “Ator Jooi ol o irimi keete ween talakec.” <sup>14</sup> Agooni gi nici o, ka buk ol o alañ eegin Juz kojokta mayuwenet baal aterkedek Jooi Ibrayim e ñaaten Kiristo, ka kojokta naaga tuwenta Vñjiz o Joowo aterkedek niini ol o atuwe.

#### Lotinok kibeet terkediiin o Joowo

<sup>15</sup> Dól o yaai tuwento, karoñnyuj di igeet ayabiztek zóoz nico baayiz onai ol o deer ele. Góon ma arom ol raman gi cineñ, alañ bodo eeti codoi ñaatineñ uulal zóoz nico, karabon bar azaac giye oman. <sup>16</sup> Baale eterkedek Jooi zóoz onin Ibrayim been dole ci dole cin. Alañ abuuñ waragewi o Joowo gi ci akati dól ci dól ci Ibrayim meelik, bar abuuñ gi ci akati dole codoi ñor noko dolene ci dól ci Ibrayim. Zin dole nico ñeen Kiristo. <sup>17</sup> Waanice zin aterkedek Jooi Ibrayim zóoz onin, ma aricanek nòon anek ne, “Didile kagoonekin waanma igeet gi nico.” Ma vurma mazi ako adicai irkitowa ceen eet tur lak wec ki tiin eetoma kamotó (430), itoonak Jooi ol o Juz lotinok. Ma lotinowa nicaga alañ anyak niigi ðoyiz ci ka kuulalti zóoz ci baal aterkedek Jooi Ibrayim neke. <sup>18</sup> Eeci waan da keterkedek Jooi Ibrayim gi ci abon gole ci azooni niini lotinok, alañ waan zin koca bodo gi ci abon aku terkediiinte onin. Bar zin kaga naaga ñóot waanice iya anyek Jooi Ibrayim kaal o eterkedek niini nòon, eeci baale eterkedek niini nòon laadun.

#### Gi o anyaani Jooi lotinok

<sup>19</sup> Mazin da laadun Jooi anyek ol lotinok o naa? Anyek Jooi nòogó lotinok niceke o olla azaacek terkediiin vurma, ka rak keyelek nòogó baciinok ñeen kalakaz zee ma ako aku dole ci baal aterket niini o. Anyaa zin waanice lotinok niceke toonnyawa o Joowo, ma avu anyek niigi eet ci kazi Mosis ka kiiya kuduwak niini ol. <sup>20</sup> Góon laadun ma añeró ol kizi kóle, abon anyak eet ci abil nòogó korgena ka kózozi niini nòogó. Bar zin Jooi adoye niini ñor noko.

<sup>21</sup> Mayo inoko zóoz nici akati gi ci lotinowa bodo amarnin kaal baal aterket Jooi niini maany e? Akom kina! Mā da lotinowa nica kanyayit ðoyiz ci arogzi ol, ajowa waan koca ol bonat ñume o Joowo giye ci azooni niigi lotinok nicoko. <sup>22</sup> Azi warage o Joowo ne, “Abal oñeci ol o loocu dook,” ka kanyozozek mayuwenet o Joowo baal aterket e ol o atu Yesu Kiristo.

<sup>23</sup> Baale zin iñaan kiiya gól o tuwento e, acabjet waanice ageet lotinowa ñóot ele zee ma aku ayelzai gól o tuwento. <sup>24</sup> Olla zin waanice lotinowa anyoneket ageet ka kuzuutet zee mazi ako aku Yesu Kiristo ka kiiya kanyet niini ageet kobonta ñume o Joowo tuwenta. <sup>25</sup> Inoko zin waazine nico iyyayet gól ci tuwento, alañaan bodo naaga kabaak ðoyize ci lotinowu.

#### Izitu niiga dól ci Joowo

<sup>26</sup> Inoko zin niiga dook izitu dól ci Joowo giye o utuyu Kiristo. <sup>27</sup> Mazin niiga o otoonyewu, oromtozeyu Kiristo, ma eeltu niiga kiyo niini o. <sup>28</sup> Okoma zin bodo inoko ñoróonnet ole o Juz been ole o alañ eegin Juz. Ma buk okoma ñoróonnet ci eet ci ceen gabaren been eet calañ een gabaren. Ma akom buk ñoróonnet ci eet ci mac ki ñaa. Odoyewu niiga dook ñaaten Yesu Kiristo tuwenta. <sup>29</sup> Zin mā izitu niiga ol ci Kiristo didi, izitu koca niiga dól ci dól ci Ibrayim, ma buk ojoktawu koca niiga mayuwenet baal aterkedek Jooi nòon e.

#### Má anuyu keerane o Juz

**4** <sup>1-2</sup> Anycañ di bodo koobeyuj kaal nicoko gole oman. Abil zóoz nici kiyo logoti o ñaan miliny, ma ooñnak baatine kaal o. Zin mayo nuun aga ol nòon een eet o tiñeere arigiz kaal o baatin ñeen o, azooni rak kaal cigin o ki nòon ele ol ogen. Ma aavi rak niini kiyo gabarenti o zee ma ako adikir. <sup>3</sup> Keel zin buk baale naaga noko ele. Baale iñaan kagaac gól ween didi e, keegin naaga gabara ci abalet kaal o loocu. <sup>4-5</sup> Bar zin ako mazi aku iitene baal arek Jooi e, itoonak niini ñeerin looc kiiya kitiryai ñaawa kiyo

eeti o deer o. Ma iya buk ozooti niini lotinok o Juz, ka kooḡa nōḡo cabiinte o lotinowo, ka naaga o kutuweec nōḡo kiziti dōl ci Joowo.

<sup>6</sup> Mazin giye o izitu niiga dōl ci Joowo, itoonayet niini ageet Vōḡiz o ḡeerin kiiya kaavu zinzeetine ogaac. Vōḡiz zin nico neen o anyet ageet kotoweec Jook zinzeetine ogaac dook kiziti ne, Baaba. <sup>7</sup> Alaḡaan zin bodo niiga eeginu gabara, bar izitu niiga dōl ci Joowo. Ma giye o izitu dōl ogin, anyuḡ niini igeet kaal dook o anyayek niini dōl ogin. <sup>8</sup> Baale iḡaan agaac Jook e, eeginu waanice niiga gabara ci joowanē o alaḡ een didi o adilyai. <sup>9</sup> Bar zin inoko agawutu niiga Jook, ma bar buk agawuḡ niini igeet ḡowa. Arooḡnyuḡ zin bodo imiirtozek kaal ci amaata akōm dōyiz o naa? Arooḡnyu ḡoto iziti gabara cigeec bodo? <sup>10</sup> Aganeku ḡoon niiga ḡaati aḡeranu iinya oogi, ki nyelōwe oogi, been irkitok oogi. Ma aricanu anyeki kizi titinye gaga nōko. <sup>11</sup> Kaḡole zin naana kaal ci agoonu niiga noko, eeci bar kizik olla da adaktan aneet zōo tuu kaale baal kagoonekuḡ igeet e gaga.

<sup>12</sup> Dōl o yaai tuwento, kilalekuḡ igeet ka ayayizaḡ aneet giye ci akati lotinok, eeci buk naana alya keen eet ci deer. Otonḡit keerane o Juz kiyo buk kuuḡ naana o.

#### Areez Pōl ol o Galatiya

ḡaan zin laadun utuguzeyan niiga aneet gi ci ger. <sup>13</sup> Agayu ri niiga waan baal kako kuuwaweyuḡ kaviyak o Joowo ḡowa e, kaave waanice ḡaatunooḡ, eeci kamoor. <sup>14</sup> Bar zin mayo nuun waanice kapirnanuḡ naana igeet mōorize nice ḡōot e, ḡaan otobortaḡ niiga aneet been neen. Bar waanice areezanaḡ kiyo areezanu toonnyai ci Joowo karabōḡ bar een Yesu Kiristo ele o. <sup>15</sup> Ma atalninu waanice niiga ḡōot ele ḡaatan. Alaḡaan zin eelnu ebaale naa? Waanice areezaḡ aneet ḡōot ele, ma kaga naana kizi da ḡoon gi ci anim eeti kaarak ḡon keberec, aartayaḡu waan niiga aneet iitene nice. <sup>16</sup> Mayo inoko anyaḡ kizi miroi giye ci kaduwakuḡ igeet zozok ceen didi o?

<sup>17</sup> Ma ol ci acinu kizik bar areezuḡ niigi igeet neke, alaḡ een ol ci abon. Arōḡolla niigi kalabtawuḡ, ka kupuwantawuḡ igeet ḡaatan, ka ḡoto ereezit niiga nōḡo, kiyo areezuḡ niigi igeet o. <sup>18</sup> ḡedet reezōnet alaḡ gerze. Abon zin waan areezuḡ ol igeet giye ci akati ḡol ci abon. Ma alaḡ abon ḡaati areezuḡ niigi igeet ḡaati kaave naana tō doon. <sup>19</sup> Dōl o yaai tuwento kareezuḡ, inoko abon naana kapirna bodo ḡaatunooḡ ḡōot ele labak kiyo ḡaa o ḡoon aam dole ka kotoyai o nōko zee ma avō abaaku baayiz o arōḡ Kiristo. <sup>20</sup> Inoko te kizi gi ci kaave naana ḡaatunooḡ ḡinaante, abon koca ka waan koobeyuḡ igeet zozok oogi bodo, eeci aviryān ziniz ḡaatunooḡ ḡōot.

#### Zōz ci ayabzonek Egar been Sara

<sup>21</sup> Karooḡ di kijin ḡaatunooḡ ol o arōḡ konowit lotinok o Juz. Udukutayaḡ di inoko agayu didi zozok o aduwa lotinowa juruḡ? <sup>22</sup> Ayeedi zōz ci azi ne, Anyak Ibrayim lōḡoz ram. Logoti codoi aritai ḡaawe ceen gabaren een miroi kazi Egar. Maje codoi aritai ḡaawe cin arōca ole o looc onin ele kazi Sara. <sup>23</sup> Ma logoti ci aritai ḡaawe ceen miroi o, aritai niini eo laadun ḡoon aritan ol dook. Maje logoti ci aritai ḡaawe calaḡ een miroi o, aritai niini, eeci baale aterkedek Jooi nōḡo Ibrayim. <sup>24</sup> Ma kaala nicigi yabziin gi. Ma ḡaai ceen ram noko ayelzakēt kaal ceen ram aterkedi. Ma ceen miroi, ma arita dōl ceen mirōk o Egar neen. Ayabzonek nōḡo zōz baal aterkedek Jooi ol lotinowe biye o kazi Sinai e. <sup>25</sup> Mazin Egar niini alya ci ayabzonek be o kazi Sinai looce o kazi Arabiya noko, niini riritōn ci ayelza kutur o kazi Jerusalem, eeci ol o abaak Jerusalem dook eegin mirōk ci acap nōḡo lotinowa. <sup>26</sup> Maje Jerusalem o abil tammu tadena kibeēn ol ogin, akōm gi ci acap nōḡo been neen. Nica zin yaatinai onai ageet neen.

<sup>27</sup> Ayeedi waragewe o Joowo gi ci azi ne, “Talo niina ḡaa o awō koliin, ma ḡaan laadun ga wucez ci aamnyin dole, eeci ḡaa ci akolonēk looc anyak bar niini ḡiḡeere dōl ci meelik kujuk ḡaa o ḡaan arome kibeēn eet.”

<sup>28</sup> Dōl o yaai tuwento, keegin naaga dōl o Joowo een didi terkediinta kiyo buk baale Aizak e. <sup>29</sup> Zin kiyo waanice logoti o aritai gole o eet o deer kazi Ismayil, agit ḡon o aritai dōyize o Vōḡiz o Joowo kazi Aizak e, kagide buk naaga nōko. <sup>30</sup> Bar zin ayeedi waragewe o Joowo zōz ci azi ne, “Tōok ḡaa ceen miroi noko ki ḡeerin kōtōzō, eeci alaḡ agano dole ci ḡaa ceen miroi o ḡaati ka kōzōlti kōrōk cuno niini kibeēn logo ci ḡaa cun alaḡ een miroi o.” <sup>31</sup> Dōl o yaai tuwento, inoko zin naaga alaḡ keegin dōl ci ḡaa ween miroi, bar keegin dōl ci ḡaa o alaḡ een miroi.

#### Aavuzit yaak ḡaaten Kiristo

**5** <sup>1</sup> Inoko zin akōmawet ageet cabiin, eeci ḡōgawet Kiristo ageet kōtōz labak. Abon zin aruweku niiga zōo looc juruḡ odoiyit kak, maḡaan bodo anyeku ol kimiirtoyūḡ igeet kootuḡ cabiinte baale.

<sup>2</sup> Iziiyit di gi ci kaduwakuḡ naana Pōl igeet ce. Mā aziiknu zozok culu. Mā agamanu teedinet, anyceyu koca niiga Kiristo kizi gi ci labak. <sup>3</sup> Inoko zin kilotuḡ igeet bodo. Mā agama eeti teedinet, adaḡewun koca niini ele gi ci ka kozooti lotinok dook. <sup>4</sup> Mazin niiga ol o arooḡnyu obonta ḡume o Joowo gole ci azoonu lotinok o Juz, eḡeryawu niiga eleeti ḡaaten deten o kajowa ḡaati Kiristo. <sup>5</sup> Bar zin kaga naaga anyet ḡiḡeere Jooi ageet kobonta ḡume onin dōyizi o Vōḡiz onin ḡaaten tuwen onai. Gi o zin inoko kare naaga neen. <sup>6</sup> Eeci mā koromtozek naaga Yesu Kiristo, akōma bodo ḡōrōwōnet ci eet ci ateedi kibeēn eet calaḡ ateedi. Bar olla izi gi ci titiny dook neen tuwen kibeēn reezōnet.

<sup>7</sup> Ma baale kizik atuwenu juruḡ. ḡeneen zin bodo ci iya abakbayanuḡ igeet tuwente unoḡo o? <sup>8</sup> Alaḡ zin agōon gi nico Jooi baal laadun otowawuḡ e. <sup>9</sup> Azi ḡoon ol ne, “Nyigita ci nyaanu miliny ter anyek nyaan dook ketede.” <sup>10</sup> Mazin giye o koromtozeke naaga Manyi, kagayuḡ naana igeet nōko alaḡ baabani cunooḡ aḡōrōwō kibeēn baabani can o. Ma buk kaga naana ḡiḡeere apayek Jooi eet ci uulaluḡ igeet noko gerzitin, yo nuun een niini eet ci titiny karabōḡ celbez.

<sup>11</sup> Dōl o yaai tuwento, alaḡaan naana kamena kuuwai ḡol ci teedinto. Mā da waan kutugu nōko, kagide zin bodo koca naa? Mazin da buk kutugu nōko, alaḡ waan koca aborne zōz onane kuuwaye daayiz o Kiristo keete ween talakec. <sup>12</sup> Mazin ol ci arican teedinet, ma uulaluḡ igeet noko, abon apaya niigi teri ugeec kiziti nyakuluknya.

#### Abaayit dōyize o Vōḡiz o Joowo

<sup>13</sup> Dōl o yaai tuwento, awuyūḡ Jooi igeet ka ḡōktai ḡōz labak. Mā zin bar anyeku zōz nico kizi waḡi ci ka utuguzi niiga kaal o arōḡ eleeti uḡoocok. Bar abon atirtonu niiga dook reezonte o Joowo. <sup>14</sup> Eeci lotinowa o Joowo dook oromnyai gole codoi tōr nōko, o ane Jooi ne, “Reez ol dook kiyo areez niina ele unun maany o.” <sup>15</sup> Bar mazi abaaku baayiz ci adawonu maany kiyo kelege o too o, abon agenyu, eeci mā agoonu nōko, uulalu koca eleeti lai.

<sup>16</sup> Inoko zin kanekuñ ne, Anycek Vɔñiz o Joowo karawoyuñ igeet kaale dook, ka calañ agoonu kaal o ger arɔɔñ eleeti ugooc. <sup>17</sup> Eeci kaala o arɔɔñ eeti ci deer amarnin kaal o arɔɔñ Vɔñizi o Joowo. Buk kaala o arɔɔñ Vɔñizi o Joowo amarnin kaal o arɔɔñ eeti o deer. Kaala ceen ram noko amarno ɔɔɔt. Mazin giye nico alañ agano ñaati agoonu niiga kaal ootine cugooc doon. <sup>18</sup> Bar zin mā arayinuñ didi igeet Vɔñizi o Joowo, alañ bodo anyak lotinowa dɔyiz ñaatunooñ.

<sup>19-21</sup> Mazin kaala o gerze aavtiz zinzeetine ci ɔl o deer agayi noko. Kaal zin nicoko neen waanjet, ki kaal ceen ririny akati waanjet, been ziniz zeen, ki diñdiñani ci joowane ci adilyai, ki tamar, ki marnɔn, ki yɔwɔn, ki madkɔn, ki bolɔac, ki zinzeeti appinjet, ki ñerɔn ci anjerɔn kizi kɔle, ki ewiin ci eewone kaal, ki baayinet, been buk kaal oogi ci ger kiyo nicigi noko. Kilotuñ zin naana igeet ɔɔɔt ele kaale nicoko kiyo rak kilotuñ iiten baale e, eeci ɔl ci agɔɔn kaal nicoko, alañ niigi arum baliin o Joowo.

<sup>22-23</sup> Zin keberti ci Vɔñiz o Joowo neen reezɔnet, ki talniin, ki ganɔn, ki zinzeeti laliz, ki gononzet, ki bonat, ki zinzeeti imeen, ki celbezitin calañ kadɔñi eleeti, been gami ci kagami eleeti kaale o ger arɔɔñ zinzeeti. Ma ɔl ci agɔɔn kaal nicoko dook, akom lotinowa gi ci agoonek nɔɔɔ. <sup>24</sup> Mazin ɔl o oromtozek Kiristo alañ bodo niigi agɔɔn kaal o ger arɔɔñ zinzeeti ugeecik. Otodoyek niigi kaal nicoko keet ween talakec baal adodine Yesu Kiristo e. <sup>25</sup> Vɔñiz o Joowo neen o anyet ageet roget. Zin giye nico abon buk kanyek naaga nɔɔnɔ karawoyet ageet baayize onai. <sup>26</sup> Alañ zin abon ñaati kadɔñi eleeti, ma alañ abon ñaati kanyeke eet oma kotobor nɔñ. Ma alañ buk abon ñaati kamadkɔn naaga maany.

#### Itirito

**6** <sup>1</sup> Dɔl o yaai tuwento, mā anyak eet ci abaca gi ci ger, abon ɔl o arayin nɔɔɔ Vɔñizi o Joowo ñaatunooñ atiritu nɔɔnɔ, ka kimirozek niini gɔl ci abon. Itiloz zin niiga nɔɔnɔ zinzeetine ci alal. Ebeyit buk niigalya eleeti ugooc, gerze ñaan iinaku oñec nico. <sup>2</sup> Itirito niiga dook. Mā agoonu noko, uzuutu koca didi niiga lotinok o Kiristo.

<sup>3</sup> Mā abaaban eeti bar kizik niini titiny, maje ñaato akom gi ci agɔɔn, alaba koca niini ele onin maany. <sup>4</sup> Abon zin gɔɔn rak añaamnek eeti liñliñɔn onin niini maany zee mā abona, ñaan abɔlɔli liñliñɔn cin o niini aliye onin doon. Alañ abon ñaati atalnin niini giye ci ajuki gɔɔn oma liñliñɔnta. <sup>5</sup> Eeci tiñeere akɔyi gɔɔn eeti ceeni ñume o Joowo kaal ogin agɔɔn niini maany.

<sup>6</sup> Mazin eeti ci edemez zɔɔz o Joowo, abon azɔl niini kaal ogin abon kibeen eet o ademez nɔɔnɔ.

<sup>7</sup> Zin má alabanu eleeti, eeci akom laadun eet ci ka kalaba Jook. Gɔɔn laadun mā aɔok eeti gi ci aɔok, bodo tiñeere ateeda niini kebere ci gi nico ele. <sup>8</sup> Zin mā agɔɔn eeti kaal o arɔɔñ nɔɔnɔ ele onine, ajowa niini daayiz. Mazi agɔɔn niini kaal o arɔɔñ Vɔñizi o Joowo, ajowa niini roget o abil been neen o anyaa Vɔñizi nici. <sup>9</sup> Abon zin naaga kamena kagɔɔn kaal ci abon, eeci mā kamena kagɔɔn noko, kavɔ koca tiñeere naaga kacin kaal ci abon ci anyaa liñliñɔnti ona. <sup>10</sup> Abon zin naaga tup kagoonek ɔl dook kaal ci abon, mate gɔɔn kajowa gɔl ci agano ñaati katirti ɔl, ricik ɔɔɔt bor o Joowo.

#### Zɔɔz o Pɔl aɔorneke

<sup>11</sup> Icinit di kayeedi zoozok nicoko kiziti appinte, ka agaac kayeedi didi naana alya aziite onan maany. <sup>12</sup> ɔl zin o gɔɔn arɔɔñ kɔkɔlta eleeti ka katalit ɔl nɔɔɔ kaale ci akati ele eci bitaalu neen ci adañekuñ igeet teedinet o. Agɔɔn niigi noko o, eeci alañ arɔɔñ giden giye ci akati daayiz o Kiristo keete ween talakec. <sup>13</sup> Mayo nuun een ɔl ci ateedi noko ele alañ azooni lotinok. Bar olla arooñnyuñ niigi igeet eteede ka kobololit giye ci agamtayu niiga teedinet cineeñ o. <sup>14</sup> Maje zin naana kabɔlɔle gi codoi tɔr noko, kabɔlɔle daayiz o Manyi ona Yesu Kiristo keete ween talakec. Eeci giye o adaayi niini keete ween talakec, alaɔaan kaal o loocu ñaatan anyak dɔyiz. Eelit niigi ñaatan kiyo kaal o adaai o. Maje buk naana alya ñaatineeñ kibila kiyo eeti o adaai o. <sup>15</sup> Mayo nuun ateedi eeti, karabɔñ alañ ateedi, adoye dook noko. Bar zin gi ci titiny neen baayizi ci abaayi eeti baayiz ci colai. <sup>16</sup> Abon bai aavi reezinet o Joowo been ganɔn ole o ano gɔl nico baayize uneeñ, kibeen buk ole o Joowo dook.

<sup>17</sup> Kaɔorneke zin zooze ci kanekuñ ne, Alañ karooñ bodo eet ci apirnanan, eeci morotaneta ci kanyei alya noko, ayelza gi o keene naana gabaren o Yesu didi.

<sup>18</sup> Dɔl o Yaai tuwento, abon bai deteni o Manyi ona Yesu Kiristo aavi ñaatunooñ igeet dook. Nɔɔnɔ neen.